



Opiniaun no Pozisaun:

“JSMP diskorda ho resposta Prezidente Tribunál Rekursu ba Komisaun A Parlamentu Nasionál relasiona ho dekokbrimentu JSMP nian iha tribunál distritál sira”

Iha 6 Novembru 2019, Komisaun A Parlamentu Nasionál halo audénsia ho Prezidente Tribunál Rekursu, meritísimu juis Dr. Deolindo dos Santos hodi diskuti kona-ba Proposta Planu Orsamentu Jerál Estadu (OJE) 2020 ba iha Tribunál sira nian.

Iha audénsia ne'e, Prezidente Tribunál Rekursu ko'alia kona-ba progresu ezekusaun orsamentu 2019 ne'ebé tuir estimasaun sei atinje 80% iha tinan nia rohan ho nia dezafiu sira no apresenta mós planu prioridade tribunál nian iha OJE 2020.

Depoide apresentasaun, iha sesaun diskusaun, distintu deputadu sira membru Komisaun A Parlamentu Nasionál, inklui partikurlamente Prezidente Komisaun, distinta deputada Carmelita Caitano Moniz apresenta situasaun réal ne'ebé Tribunál Distritál sira hasoru iha tinan sira liu ba to'o agora liuliu iha parte facilidade no rekursu umanu nian.

Kestaun sira ne'ebé deputadu sira foti iha audénsia ne'e bazeia ba paraser JSMP nian ne'ebé apresenta ba Komisaun iha 29 Outubru 2019 kona-ba rezultadu deskobrimentu JSMP nian relativamente facilidade no rekursu umanu iha setór justisa ne'ebé inklui partikularmente tribunál distritál sira.

Iha paraser ne'e, JSMP hato'o nia observasaun katak facilidade ne'ebé la di'ak, la sufisiente no rekursu umanu ne'ebé limitadu difikulta funksionamentu normál no servisu Tribunál Distritál sira-nian hodi asegura justisa ba ema hotu. Hatan ba kestaun sira ne'e, Prezidente Tribunál Rekursu hateten katak relatóriu ne'e la relevante ona ho situsaun sira ne'ebé tribunál sira hasoru agora no nia konsidera facilidade sira iha tribunál distritál sira iha di'ak ona no bele fasilita atividade tribunál sira-nian la'o ho normál.

“JSMP konsidera Prezidente Tribunál Rekursu nia resposta ne'e la refleta loloos ho faktu no realidade sira ne'ebé akontese iha tribunál distritál sira. Problema sira ne'ebé JSMP apresenta ba Komisaun A Parlamentu Nasionál liuhosi paraser ne'e maioria sei nafatin mantein no fó impaktu ba funksionamentu normál no efetividade servisu tribunál sira-nian. Nune'e, JSMP hanoin importante atu Parlamentu Nasionál nafatin tau iha konsiderasaun faktu sira ne'e hodi bele koloka orsamentu ne'ebé sufisiente no hadi'a mekanizmu jestaun no administrasaun iha Tribunál

Rekursu atu bele solusiona ho di'ak problema sira ne'e iha 2020, dehan Diretór Interinu JSMP, Casimiro dos Santos.

JSMP nia intensaun liuhosi paraser ida ne'e atu hodi hadi'a servisu no funksionamentu tribunál sira-nian iha administra justisa tuir Konstituisaun no lei sira haruka. Bainhira tribunál sira funksiona no servisu ho di'ak no efetivu, bele hametin liu tan públiku nia konfinasa ba tribunál sira no atinje objetivu Estadu iha aseguara direitu sidadaun sira-nian iha asesu ba justisa formál.

Liuhosi deklarasaun pozisaun ida ne'e, JSMP mós nafatin apresenta faktu sira ne'ebé JSMP ba konfirma direita ba iha tribunál distritál sira balu iha 7 no 8 Novembru 2019, liuhosi entrevista ho juis no sekretária judisiál sira balun no halo observaun direita ba situasaun sira iha Tribunál sira ne'e.

Autoridade hirak ne'e nafatin hato'o sira-nia preokupasaun ne'ebé to'o agora seidak iha solusaun no preokupasaun sira ne'e JSMP deskreve iha tabela tuir mai. Iha JSMP nia observaun direita ba facilidade sira ne'e hatudu katak preokupasaun sira ne'e refleta duni situasaun sira no fó impaktu sériu ba funksionamentu serbisu tribunál sira-nian ho efetivu.

Faktu atuál sira ne'e, JSMP koloka iha tabela sira ne'ebé aneksa ho dokumentu ida ne'e.

Tabela 1 Fasilidade

Tribunál	Fasilidade	Kuantidade	Kondisaun	Observasaun
Tribunál Distritál (TDD)				
	Sala julgamentu	5	Di'ak	Sala julgamentu la sufisiente nune'e impaktu ba prosesu julgamentu ba kazu kle'ur tanba sei hein malu fatin
	Gravadór		Balun di'ak/aat la	Presiza hadi'a ka sosa foun
	Air Conditioner (AC)		Aat hotu	Presiza hadi'a ka troka foun
	Sanitasaun		Aat no foer	Presiza hadi'a no hamoos
	Kareta operasionál		Di'ak	Númeru kareta ne'e bainhira sukat ho servisu operasionál la sufisiente no dala barak fó impaktu ba prosesu julgamentu
	Sala servisu juis sira-nian		Di'ak	Sala juis sira sei nafatin la sufisiente. Iha juis rua tolu mak tur hamutuk iha fatin ida de'it.
	Sala servisu ba ofisiál justisa	4	Sei di'ak	Tuir observasaun JSMP nian mezmuke sala sira ne'e sei di'ak hela, maibé espasu serbisu ba ofisiál justisa la to'o no adekudu tanba espasu klot, enkuantu númeru ofisiál justisa 43 tuur hamutuk de'it iha sala 4 ne'e. Aliende ne'e la iha espasu ba rai almáriu ba rai dokumentu/arkivamentu. Tuir informasaun hosi ofisiál sira katak fatin ne'e la seguru tanba la iha CCTV ne'ebé bele ajuda deteta ema ruma ne'ebé bele tama hodi na'ok ka halakon tiha prosesu sira.
	Rede internet		La di'ak/aat	Rede internet ne'ebé aat fó mós impaktu ba servisu tribunál nian ligadu ho asesu informasaun nomós rejistu dadus sira
	Sala detensaun		Di'ak	Sala detentasaun nafatin lasufisiente tanba iha detidu balun ne'ebé tuur de'it iha li'ur bainhira mai tuir julgamentu

	Komputadór ba juis no ofisiál justisa		La di'ak	Komputador ba juis no ofisiais justisa balun tuan ho sistema todan fó impaktu ba servisu juis sira nian.
Tribunál Distritál Baucau (TDB)	Sala julgamentu	2	La di'ak tanba ho kondisaun fasilidade limitadu	Sala julgamentu iha rua de'it maibe juis iha nain 7 ho prosesu ne'ebé julga ba loron ida kuaze 10 ba leten. Tanba ne'e presiza tenki aumenta sala ba julgamentu. Sala julgamentu ne'e mós laiha gravador no kadeira ho meja mesak tuan hotu ona.
	Sala ba juis	5	La di'ak tanba klood no la suficiente	Sala ba juis iha 5 kompleta ho kadeira, meja no armáriu ida maibé ho espasu ne'ebé klood nune'e juis sira nia prosesu barak tenki tau tuun iha rai no nakonu iha meja servisu fatin. Husi sala 5 ne'e, juis nain 3 mak uza sala keta-ketak, enkuantu juis nain 4 seluk uza sala 2 hamutuk. Nune'e presiza tan aumenta sala ba juis sira ho espasu ne'ebé luan no aumenta armáriu ba juis sira hodi rai prosesu.
	Hela fatin ba juis (rezidencia)	2	Di'ak maibé la suficiente	Hela fatin ba juis limitadu tanba iha deit rezidencia 2 maibé juis Administrador mak hela ba no juis sira seluk hela iha uma aluga.
	Fatin ba prokuradór, defensór, advogadu no parte sira seluk iha tribunál	La iha		Tribunál la iha fatin ka espasu própriu ba prokuradór, denfensór, advogadu no parte interesadu sira seluk. Ida ne'e difikulta vitima no arguidu sira atu ko'alia ho prokuradór no defensor bainhira sira presiza. Nune'e, importante atu kria espasu ba sira.

Fatin ba rai objetu krime	La iha		Objetu krime sira ne'ebé prende taka de'it ho triplex iha sala julgamentu nia klaran. Nune'e presiza iha fatin própriu ida atu bele rai objetu sira ne'e.
Gravadór			Gravadór iha maibe la uza tanba ekipamentu balun seidauk kompletu.
Sala ba ofisiál justisa iha sesaun krime nian	2	Di'ak maibé la suficiente	Sala rua ne'e nia espasu klood liu. Iha sala ida ema na'in 6 mak okupa no sala ida fali ema na'in 2. La iha espasu ba atu rai no haloot dokumentu sira tanba aliende klood, sala rua ne'e nakonu ona ho meja servisu ofisiál justisa sira-nian. Nune'e presiza aumenta sala ba ofisiál justisa.
Armáriu ba rai dokumentu no prosesu sira	26	Diak maibé la suficiente	Armáriu ne'e ba juis no ofisiál justisa maibé la suficiente. Ofisiál justisa sira iha sesaun krime nian la iha armáriu própriu atu rai dokumentu no prosesu sira. Dokumentu no prosesu sira tau hamutuk de'it iha sira-nia meja leten inklui tau iha rai. Juis sira mós infrenta situasaun hanesan tanba armáriu la to'o nune'e prosesu barak tau deit iha rai.
Komputadór	22	Ladun di'ak tanba komputador barak ho sistema todan tanba utiliza tinan naruk ona	Komputadór hamutuk 22 koloka ba juis nain 7 no restu koloka ba ofisiais justisa ba seksaun krime, sivil no sentral. Maibé aliende komputadór tuan ho sistema todan, komputador ne'e mos lasuficiente ba ofisiais justisa sira.

Sala ba ofisiál justisa iha sesaun sivil nian	1	Di'ak	Sala ida ne'e nia espasu klood tanba ofisiál justisa na'in 4 mak uza hamutuk ho meja 3 no armáriu 2. Nune'e sala ba ofisiál ba sesaun sivil nian seidakuf suficiente.
Sala iha sesaun sentrá	1	Di'ak	Sala ida ne'e mós klood tanba ofisiál justisa na'in 5 mak uza hamutuk no sala ne'e mós uza ba rai armáriu 1 no meja 3.
Fatin hela ba ofisiál justisa sira	La iha		Maioria ofisiál justisa sira hela iha fatin aluga. Presiza iha hela fatin ba ofisiál justisa sira.
Kareta operasionál	2	Di'ak maibe la suficiente	Kareta operasionál 2 ne'e la to'o tanba area jurisdisaun TDB nian boot inklui ba atividade operasionál lubuk ida hahu husi notifikasaun, mandadu ba libertasaun inklui lori karta prekatoriu. Nune'e presiza tan kareta 2.
Motorizada	3	Di'ak	Mezmuke motorizada ne'e bele uza hodi apoiu kareta operasionál sira, maibe iha termu seguransa no kestaun natural hanesan udan no anin boot, la favoravel atu uza. Nune'e di'ak atu bele sosa tan de'it kareta operasionál.
Rede internet		Di'ak	Laiha problema
Sala julgamentu/audiénsia	2	ladun Di'ak no la suficiente	Sala julgamentu ho kondisaun uza kadeira tuan desde 2008 no laiha AC, laiha gravasaun. Kestaun seluk maka pior liu bainhira juis nain 6 marka julgamentu ba singular prejudika parte sira dala barak tenki hein husi dadeer to'o lorokraik tanba tanba sala julgamentu rua deit ate balun tenki adia hikas ba lora seluk. Situasaun ne'e lamentavel tebes tanba parte sira

Tribunál Distritál Suai (TDS)				ne'e balun ema kbiit la'ek maihusi distritu Bobonaro, Manufahi, Ainaro no Covalima rasik ne'ebé sira tenki gasta osan ba mai ba despeza han no transporte nian.
	Sala detensaun iha tribunál	Iha	Ida	Kondisaun ladun moos tanba laiha manutensaun ba sala laran no ho espasu klood
	Armajen ba rai objetu krime	Ida	Nakonu ona	Sala ba objetu krime ida maibé agora dadaun nakonu ona, nune'e objetu barak ejemplu, solar no motor tau de'it iha li'ur. Ida ne'e la siguru
	Meja no kadeira	20	Menus	Númeru meja la suficiente liuliu iha sala sentrál no sala ba ofisiais justisa iha seksaun krime no sivil nian. Kadeira menus ba ofisiais justisa sira liuliu ba sala sentrál nune'e bainhira parte sira ba konfirma notifikasaun ka halo akta, ofisiais balun tenki sai ba li'ur tanba tenki oferese sira nia kadeira ba parte sira no sei tama fali bainhira remata ona.
	Armáriu	Armáriu boot 3 boot no kiik 4	Armáriu menus tebes	Armáriu ba juis no ba sala sentrál inlui sala sivil no krime menus. Armáriu ba juis laiha no dokumentu ba kazu sira tenki tau deit iha rai no meja leten ne'ebe juis sira uza babain hodi halo servisu. Armáriu ba ofisias justisa la too tantu iha seksaun krime no sivil no sala sentral, Armáriu iha sesaun krime no sivil iha rua de'it no la suficiente hodi tau dokumentu ba prosesu nian.
	Komputadór	Komputadór iha 8 ba seksaun sentral, krime,	Komputadór ba juis iha maibe komputador	Númeru komputadór ba juis suficiente maibé ho kondisaun tuan. Ida ne'e dala barak prejudika juis sira nia servisu tanba sistema todan.

		no sivil Enkuantu komputadór iha 2 ba tradutór nain 2	tuan kuaze utiliza tinan 10 resin ona. Komputadór hamutuk 7 ba ofisiais justisa enkuantu ofisiais justisa hamutuk 12	Komputadór ba ofisiais justisa la suficiente nune'e dala barak ofisiais justisa sira tenki hein malu halo akta ba julgamentu ka despaxu sira inklui balun tenki mai halo fali servisu iha kalan.
Kareta operasionál	2		Kareta operasionál iha rua maibe agora dadaun 1 tama ona ofisina tanba aat.	Situasaun halo ofisiais justisa sira tenki hein malu no tarde tanba kareta operasionál 1 (ida) de'it enkuantu sira tenki utiliza hodi ba halo notifikasaun, providensia kautelar no mandadu ba libertasaun ne'ebé kobre ba distritu 4, Covalima, Manufahi, Ainaro no Maliana.
Jeradór	1			Kondisaun di'ak
Rede internet	Rede internet ladun funsiona ho diak			Dala ruma rede internet lalao tanba kapasidade kiik no prejudika julgamentu sira tenki tarde ka adia tanba labele asesu ba prosesu sira
AC	AC 9		AC ho kondisaun la di'ak ona no nia kuantia la to'o bas ala hotu	AC 9 ne'e ho kondisaun tuan hotu tanba monta desde tinan 10 liu ona AC 9 ne'e koloka monta ba sala julgamentu 1 enkuantu sala julgamentu seluk AC laiha. AC iha sala julgamentu ladun funsiona diak nune'e dala barak juis, prokurador no defeza tenki husu suspende julgamentu ba minute 5 ka 10 hodi sai ba liur foin tama fali mai

				<p>kontinua julgamentu.</p> <p>Juis nain 6 iha hotu AC maibe ho kondisaun la funsiona ho di'ak.</p> <p>Enkuantu sala seksaun sentrá, seksaun krime no seksaun sivíl, AC aat ona nune'e afeita sira nia servisu</p>
	Gravadór	Laiha	Laiha	Gravadór laiha. Ida ne'e prejudika ba tribunál nia servisu hodi prepara ata ba prosesu.
	Perdiem or Movements of personnel (MOP) sempre atrazu			<p>Tribunál Rekursu sempre atraza fó fila hikas Perdiem ka MOP ba staff atividade operasionál hotu, hahú husi notifikasaun, julgamentu movel mandadu ba libertasaun, no lori karta prekatoriu ba tribunál jurdisaun seluk.</p> <p>MOP ba juis ba julgamentu movel mós sempre atraza too fulan 2 ka 3.</p>
	Osan ba brankas ki'ik liu	Osan iha brankas US\$250/kada fulan		Konsidera ida ne'e montante ne'ebe ki'ik tebes tanba labele responde ba nesesdidade urjente, ezemplu kombustivel urjente ba movel, perdiem ba ofisiais justisa ba movimentu operasionál sira hotu.
Tribunál Distritál Oecusse (TDO)	Armajen ba objetu krime	1	Di'ak	Espasu armajen la suficiente atu rai objetu krime sira, tanba ne'e tenke iha sala foun.
	Komputadór ba ofisiál justisa	8	Di'ak	Mezmu iha ona komputadór foun ba ofisiál sira, maibé sei falta ba ema na'in rua.
	Gravadór	La iha		Presiza fornese gravadór
	Brankas ba rai objetu ba krime	La iha		Presiza iha brankas atu rai objetu krime sira hanesan osan no pistol nsst.
	Sala ba vítima no testemuña	La iha		Presiza iha sala própria ba vítima no testemuña sira

Tabela 2 Rekursu Umanu

Tribunál	Rekursu umanu	Kuantidade	Observasaun
Tribunál Distritál Dili (TDD)	Juis	13 (permanente) 3 (estajiáriu)	Tuir observasaun JSMP nian, númeru juis nafatin la susifiente kompara ho numeru kazu ne'ebé barak husi distritu haat ne'ebé partense ba juridiksaun TDD nian. Prova hatudu katak iha tinan 2018, TDD konsege julga de'it kazu krime hamutuk 1505 husi total kazu 3869 (mai husi kazu pendente 2417 iha 2017 no 1452 kazu foun iha 2018). Nune'e iha 2018, TDD hela ho kazu pendente hamutuk 2364. Enkuantu ba kazu sivil pendente hamutuk 820 husi total kazu 960 (mai husi total kazu pendente 658 iha 2017 + 302 kazu foun iha 2018) ¹
	Ofisiál justisa	43 (feto:8 & mane: 35) Ofisial justisa ba seksaun krime hamutuk 12 inklui ona ho Xefi seksaun	Tuir observasaun JSMP tuir loloos kada juis ida iha ofisiál justisa na'in rua katak ofisiál justisa ida ba kazu krime no ida ba kazu sivil bazeia ba volume servisu juis TDD nian aas liu kompara ho juis iha tribunál juridisaun sira seluk. Nune'e JSMP rekomenda atu bele rekruta tan ofisiál justisa balun atu bele koloka hodi apoiu juis sira ida-idak.
	Tradutór	4 (kontratadu)	Tuir observasaun JSMP nian, númeru tradutór no iha TDD la sufisiente relasiona ho tipu kazu ne'ebé tama iha TDD barak liu kazu boot ne'ebé envolve ema estranjeiru ho lian oioin. Situasaun ne'e dala barak prejudika adiantentu ba julgamentu liuliu ba lian Xina no Inglesh.

¹ <http://jsmp.tl/wp-content/uploads/OJS-2018-report-TETUM.pdf>

			JSMP mós hanoin atu kontrata tradutór ne'ebé sufisiente iha termu koñesimentu ba lian esterañjeiru no lokál sira.
	Kondutór	6	Tuir observasaun JSMP nian, númeru kondutór barak maibé kareta operasionál 2 de'it nune'e kondutór balun tur de'it. Nune'e, JSMP rekomenda atu bele sosa kareta ne'ebé natoon atu fasilita servisu tribunál nian
Tribunál Distritál Baucau (TDB)			
	Juis	7	Sufisiente ona
	Ofisiál justisa	15	Sufisiente ona
	Tradutór	3	Tradutór tolu ne'e ba lian Portugues, Indonezia no Ingles. Maibé iha problema ba lian materna tanba maiória parte sira iha juridisaun Baukau, uza liu lian materna duke tetun. Maibé tradutór tribunál nian hatene de'it lian materna tolu waimua, midiki no tetun terik enkuantu laiha tradutór ba lian Fatuluku, saane, makalaro, naueti no galolen. Nune'e dala barak tribunál bolu fali tradutór husi liur inklui polísia sira. JSMP konsidera ida ne'e ladun dí'ak tanba bele mós la asigura imparcialidade husi parte sira ne'ebé sai tradutór ba prosesu ne'e.
Kondutór	2	Kareta 2 uza ba atividade operasionál la sufisiente tanba juridisaun ida ne'e kobre mós distritu 4, Vikeke, Baukau, Lospalos no Manatutu. Entaun dala barak ofisiais justisa tenki hein malu atu lori notifikasaun, karta prekatoriu no ka mandadu libertasaun mai Díli, sekuandu kareta hirak ne'e sai hotu, afinál despaxu hirak ne'e maiória tenki la'o tuir determinasaun tempu.	

Tribunál Distritál Suai (TDS)			
	Juis	6	Juis nain 6 suficiente ona.
	Ofisiais justisa	13	Ofisiais justisa konsidera sei menus kompara ho volume servisu ne'ebe tanba ofisiais ne'ebé responsavel ba seksaun krime no sivíl iha nain 6 de'it no seluk ba responsavel ba notifikasaun.
	Tradutór	2	Tradutór rua ne'e ba lian Portuges, Inglesh no Indonézia. Maibé iha problema ho tradusaun ba lian materna, tanba entre tradutór rua ne'e so hatene maka lian Kemak enkuantu bunak no lian materna balun tan sira lahatene.
Kondutór	3	Suficiente ona .	
Tribunál Distritál Oecusse (TDO)			
	Juis	1	Situasaun ne'e problema tanba juis nain 1 de'it responsabiliza ba kazu barak. Bainhira juis ne'e moras, ba atende tiha enkontru urjente ruma ka treinamentu ruma iha Dili, julgamentu dala barak tenki adia.
	Ofisiál justisa	5	Ofisial justisa suficiente ona.
	Tradutór	2	Tradutór sira ne'e ba lian Portuges no Baekenu. Enkuantu lian Indonezia, China no Inglesh laiha.
Kondutór	1	Númeru ne'e la suficiente no la kontribui tebes ba atividade operasionál tribunál nian tanba motorista nain 1 ne'e kobre tula juis nomos hala'o atividade operasionál tribunál nian. Entaun bainhira motorista refere tula tiha juis mai Díli, dala barak ofisiais justisa sira tenki hein to'o motorista ne'e fila foin ba halo notifikasaun, inklui lori karta prekatoriu ka mandadu libertasaun ba prezu sira.	

Aleinde dadus no informasaun sira ne'ebé JSMP apresenta, iha mós deklarasaun balun ne'ebé tribunál rasik hasai iha mídia nasional sira kona-ba kondisaun facilidade no rekursu umanu sira iha Tribunál Distritál sira. Deklarasaun sira ne'e hanesan tuir mai ne'e;

Meritisimu juis administradór TDD, Dr. Afonso Carmona hateten katak sala julgamentu iha TDD limitadu hanesan mós ho sala julgamentu iha TDB. Maibé kondisaun TDB aat liu tanba iha de'it sala rua hodi halo julgamentu.

“Kondisaun TDB ladun di'ak, difikulta oras julgamentu tanba iha de'it sala audiénsia rua,”dehan Carmona iha knar fatin, TDD. (Timor Post, 08 Novembru 2019, Pajina 14)

Merítisimu juis Administradór Tribunál Distritál Suai (TDS), Dr. Jose Maria de Araújo, hatete Tribunál Suai haree husi li'ur kapas, maibé kuandu tama ba laran kondisaun la permite ba juis sira tanba konstrusaun ne'e foin halo iha tinan rua liu bá maibé facilidade ne'ebé iha agora daudauk ne'e nafatin uluk nian.

“Buat ida halo hau hakfodak, haree husi liur tribunál ne'e edifisiu foun tanba foin reabilita iha tinan rua liu ba no fin facilidade ne'ebé uja, facilidade antigu desde hau juis iha ne'ebá,” (Jornál Independente, 04 Novembru 2019)

Merítisima juisa Tribunál Distritál Dili (TDD), Dra. Sribuana da Costa husu ba Konsellu Superior Magistratura Judisiál (KSMJ) atu koloka tradutór lian la'ós ofisiál permanente iha tribunál sira nune'e la prejudika julgamentu ba sidadaun sira ne'ebé la hatene lian ofisiál (tetum no portuges).

Liu hosi julgamentu iha TDD, Kinta-feira 24 Outubru 2019, Juisa Sribuana iha sala audénsia julgamentu, hafoin adia krime omisídiu ida husi Ermera inklui krime ofensa envolve sidadaun Xineza ida tanba arguidu ne'e la komprende lian tetum.

“ Ita sei menus tradutór lingua, tanba ne'e prejudika juis sira atu loke prosesu ba arguidu sira ne'ebé la komprende lian ofisiál Timor-Leste nian,” (Timor Post, 25 Outubru 2019)

JSMP espera katak dadus sira ne'e bele ajuda di'ak liu tan Tribunál Rekursu atu bele prepara planu no proposta OJE 2020 ida ne'ebé bele refleta ho di'ak realidade sira ne'e hodi bele fó solusaun ne'ebé apropiadu ba problema sira. JSMP espera katak ho dadus sira

ne'e, distintu deputadu sira bele haree, diskute no aloka orsamentu ne'ebé suficiente hodi bele solusiona problema sira ne'ebé tribunál distrital sira hasoru nune'e bele asegura justisa ida ne'ebé di'ak, efetivu no efisiente.

Dili, 15 Novembru 2019

Casimiro dos Santos
Diretór Interino JSMP
Email: Casimiro@jsmp.tl
Telefone: 77257466
Website : <http://jsmp.tl/>